

18.05.2022.

Prilika da se razmotre mogućnosti za plasiranje goraždanskih proizvoda na norveško tržište



Nakon učešća na 11. Sarajevo Business Forumu 2022 održanog 11. i 12. maja u Sarajevu na kojem su učešće uzeli i predstavnici BPK Goražde, u zajedničkoj organizaciji Ministarstva za privredu BPK Goražde, Grada Goražde, Privredne i Obrtničke komore i Udruženja poslodavaca BPK Goražde, danas je u Sali Biznis centra u Goraždu održan sastanak sa predstavnicima „Norveško-bosanske privredne komore“ koja djeluje na teritoriji BiH i Norveške.

Povod za današnji sastanak je preciziranje mogućnosti za buduću saradnju, a prema riječima ministra za privredu BPK Goražde Harisa Salkovića, s obzirom da naš kanton ima izuzetno razvijenu industrijsku proizvodnju, bila je ovo prilika da se razmotre mogućnosti na koji način pomoći našim privrednicima da svoje proizvode plasiraju na norveško tržište, a pored toga da

se sagledaju i mogućnosti za dolazak investitora iz Norveške u naš kanton.



„Želimo da ponudimo projekte koji su njima možda interesantni za ulaganje, kao i da ponudimo podršku kada je riječ o prikupljanju neophodne dokumentacije koja bi trebala prethoditi realizaciji tih projekata“-kazao je ministar Salković.

Kako je ovom prilikom naglasio predsjednik “Norveško-bosanske privredne komore” Ahmed Lindov, komora služi kao kontakt firmama iz Norveške koje traže proizvođače u Bosni i Hercegovini, te iz tog razloga je uslijedila današnja posjeta BPK Goražde.

